



阿奶

頭擺細漢个時，阿爸阿姆無閒田事，阿奶渡吾等兩姊妹在屋家寮，半晝半暗阿奶驚吾等枵，輒輒會變食來塞吾等个嘴空。阿奶手藝當好，也已曉得變巧，平常時佢會打水板、蚵蜆板，打好个板面頂放兜炒香个蔥花同幼菜脯過滴一屑豆油，斯當好食咧！熱天打黃梔板、寒天炊菜頭板，過較輒會煎麵粉板。這係當簡單又好食个點心，阿奶會同吾已紅个木瓜抑番薯、黃瓜剉(cod^h)籤，也識用切幼个韭菜、蔥花、芫荽、高麗菜這兜摻入麵粉肚罈水攪攪嚟，掖屑鹽花落鑊煎，煎去兩面金黃金黃。想愛食較赤兜也使得，加煎一下，酥酥香香斯使得撩起來裝盤；若想食甜个，過較簡單，麵粉水摻赤砂糖斯使得煎甜个麵粉板咧。在該無麼个噉嗒好食个時代，阿奶打个板斯係吾等細人時節盡好个點心咧！

雖然阿奶當惜吾等，毋過也有當嚴條个時節，佢規定吾等定著愛睡當晝，一食飽晝斯同吾等逐去睡當晝，佢同灶下撿拏好乜會來同吾等共下睡。細人哪肯乖乖睡當晝，在眠床項貶來貶去睡毋撇，阿奶斯會用厥腳同吾腳夾核，毋分佢翻身，毋多知斯分阿奶揸睡撇咧。一覺目睡到下晝三點左右，正分阿奶喊跣床。

阿奶當惜厥个頭那毛，一禮拜會洗一到毛，逐到洗毛差毋多愛一點鐘久。因致驚寒，阿奶會在下晝頭在禾埕洗頭那毛。佢用錫桶啟好半燒冷个水，兜張矮凳坐在禾埕，解開厥个髻髰，烏、白、灰摻核个長頭那毛斯遮撇阿奶个面，阿奶先用梳定定同厥頭那毛梳順，正開始洗頭。阿奶係一個當遽手个人，毋過洗頭這件事，佢定著愛慢慢來，用洗頭那毛粉洗到歸頭都係波，正用水沖一遍過一遍。厥驚自家沖毋會淨，會喊阿姊用杓嫲舀水同佢沖頭那毛，細人手尾力無罈，長在會沖著阿奶个衫抑係耳公，阿奶也毋會譴，頭那毛洗好佢會坐在日頭下，慢慢用面帕同頭那毛粹燥，正過搽頭那毛个油、梳髻髰，等阿奶髻髰梳好，厥洗毛个儀式正結束。

阿奶當誠心，逐日打早先拜好屋家个神明了後，還會去伯公下換神茶、燒香，有時堵著鄰舍會共下坐寮、打嘴鼓，臨暗頭也會帶吾等姊妹共下去拜伯公，阿奶講：「人毋好做壞事，頭那頂三尺有神明，做壞事會有報應；若做好事，神明定著會保護你。」教吾等愛敬神，愛行正路。吾讀書該幾年，好得有阿奶照顧吾等，阿爸阿姆正有好打拏田事，也好得有恁泥个機會，吾等姊妹同阿奶學著簡單个煮食、也細細漢斯曉得搵手屋家肚个事，因致有阿奶陪伴，吾等个童年快樂又燒暖。

作者：徐姿華

☆詞彙學習☆

【半晝半暗】ban^h zhiu^h ban^h am^h：指時間臨近午時或天黑之際。

【變食】bien^h shid^h：弄吃的。

【蚵蜆板】la^h kia^h ban^h：大埔客家人用芋頭剉籤來做的板，因為蒸熟後外露的芋頭籤看似蚵蜆的腳，故而得名。

【黃梔板】vong^h gi+ ban^h：用黃梔子泡水和地瓜粉蒸出來的板。

【噉嗒】dong^h dab^h：零食。

【嚴條】ngiam^h tiau^h：嚴格。

【毋多知】m^h do+ di+：不知不覺。

【遽手】giag^h shiu^h：手腳俐落，動作很快。

【手尾力】shiu^h mui+ lid^h：手勁、力氣。